



KARAI KASANG A HPYEN HKING

SASANA AMU A MATU JIN
JIN RAI NGA GA

Rev. Dr. James Paul Humphries
Rev. Dr. Lahtaw, Zau Sam

Ya kaw nna dai Madu hte, shi a n-gun marai a atsam
hta e, n-gun lapyin rawng nga mu. Nat e maw ai
hkalem hkalau ai lam hte hpe nanhte manga kau lu
myit ga, Karai Kasang jaw da ai hpyen hking nlang
hte hpe bu hpun dagraw nga mu. Ehpesu 6:10-11

GABAW:

KARAI KASANG A HPYEN HKING

KA LAJANG AI:

Rev. Dr. Lahtaw Zau Sam

ISBN: 978-1-927468-19-7

COPYRIGHT © 2009 Rev. Dr. Lahtaw Zau Sam

All rights reserved. No part of this publication may be reproduced, stored in a retrieval system or transmitted, in any form, or by any means, electronic, mechanical, photocopying, recording, or otherwise, without the prior written permission of Project L.A.M.B.S. publications, Myanmar.

Matsing: Chyum Laika daw ni yawng hpe Dr. Ola Hanson gale da ai Jinghpaw Chyum Laika kaw na mahta da ai. Ndai “ * ” kumla madun da ai Chyum Laika daw ni hpe chyu sha KBC kaw nna bai dip shapraw ai Ga Shaka Ningnan Kabu Gara Shiga Chyum Laika kaw nna mahta da ai.

First Printing: August 24, 2009

Second Printing: March 15, 2012

Buga Hpung kata hta shadawn sharam hte dip shapraw ai.

KARAI KASANG A HPYEN HKING

MALAWM

GA NHPAW	5
I. HPYEN MA WA A N-GUN	12
II. HPYEN MA WA A NINGHKAP MAJAN	16
III. HPYEN MA WA A HPYEN HKING	19
a. Hkye Hkrang la ngu ai Hpri Gup Chyawp	20
b. Dinghpring ngu ai Sinda Magap	22
c. Tengman ngu ai Shing Kyit	24
d. Kabu Gara Shiga ngu ai Hkyepdin	26
e. Makam Masham myit ngu ai N-gang	27
f. Karai Kasang a Mungga ngu ai Wenyi Ntawng Nhtu	29
IV. HPYEN MA WA A MYIT MASA	31
V. HPYEN MA WA A ATSAM	34
VI. HPYEN MA WA A SHIGA	36
GA HPUNGDIM	38
Appendix:	
a. Hpyen gasat na jin jin rai nga ai hpyen ma langai a hpyen hkying ni	41
b. Kahtap nna hti na Chyum ga ni	42
c. Matsing na hte bai myit sumru ka na matu	43

KARAI KASANG A HPYEN HKING

1. Yaw Shada Lam

Ndai laika buk kaji gaw, Hkristu a sape ni makam masham hkrun lam hta sak hkrung hkawm sa ai ten, n gun la, lam madun, karum lu na hpe yaw shada let ka lajang dip shapraw dat ga ai. Hkristu hta kam sham sai sape langai, grau nna rawt jat kung hpan wa na lam hta chye na da ra ai lam ni hpe sharin achyin, lam madun, lakung lakap jahkum ya ai laika buk kaji rai nga ai. Hkristu gaw kamsham ai sape wa kaw nna, htani htana ngang grin ai asi si ai hpe mu mayu nga ai. Ndai laika buk kaji hpe hti hkaja ai a majaw, Hkristu Yesu a hpang hkan kaja tai wa na hpe anhte myit mada ga ai. Karai Kasang a mungdan a matu hking jahkum la nna, pru sa let kaga masha law law hpe sape shatai lu ai, magam bungli galaw na masha ni hpe Hkristu gaw tam nga ai.

2. Ga Gale ai lam

Ndai laika buk kaji hta English hte Jinghpaw ga lahkawng yan hte ka da ai hpe mu lu na re. Ga gale ai lam hta English kaw nna Jinghpaw de ga si shagu hpe ading tawk byan ai hku n re ai sha, a hkyak madung yaw shada lam, lachyum ni hpe n shamat jashai kau ai sha, shakut nna byan da ga ai. Hpa majaw nga yang kalang marang English ga si hpe Jinghpaw ga hku nna, htap htuk manu, lachyum rawng chye na mai na hku byan la yak ai gasi ni mung nga nga ai. Dai majaw ndai laika buk hpe hti ai shaloi nkau ni a matu nhkawn hkrang ai lam ni mung nga na re. Raitim, Chyum laika hte matut mahkai shingdaw let akyu hpyi nna

KARAI KASANG A HPYEN HKING

hti hkaja ai rai yang n dai mungkan sak hkrung lam hta na teng man ai mungga hpe tam sawk la lu na re.

3. Chyeju dum ai lam

Marai langai hkrai galaw ai amu gaw ngut kre na nloi nga ai, dai majaw karum shingtau ai shingdep shingtau ni hte magam bungli hpe rau jawm galaw yang gaw ngut kre awng dang lu nga ai. Karai Kasang lam madun ai hte lawu de na karum shingtau la ai manaw manang ni hpe grai chyeju dum nngai.

Lahi Yaw Htung - Translator

Kumbau Naw Awng - Computer & Layout Technician

Bummyang Hkaw Win - Translator & Editor

Grau nna, *Rev. Dr. Maji La Ja* kaw nna ndai laika buk kaji hpe hti jep matsun madun hpaji jaw la ai a majaw alak mi grai chyeju dum nngai. Ndai laika buk gaw anhte a myit masin hpe hkra shangun ai zawn, nang hti ai wa a myit masin hpe mung hkra lu u ga akyu hpyi ya dat ga ai. Karai Kasang a hpung shingkang dan hkung wa lu u ga.

Hkristu a mayam wa,

Rev. Dr. Lahtaw Zau Sam

KARAI KASANG A HPYEN HKING

GA NHPAW

Hkristu ndai dinghta mungkan e shinggyim masha langai hku nna sak hkprung hkawm sa ai shaloi “Karai Kasang a Mungdan” lam hpe law law lang ndau shana tsun shabra lai wa sai. Chyum laika hta na kabu gara shiga laika ni rai nga ai Mahte, Marku, Luka hte Yawhan ni hta “Karai Kasang a Mungdan” ngu ai ga hpe (40) lang ram lang da nga ai hpe mu lu ga ai. Anhte Hkristu a sape tai sai hte nan, Hkristu a Mungdan a mungchying sha ni tai lu sai. Anhte gaw ndai mungkan a matu n rai, malet nhprang ndai mungkan hta aten kadun nga pra ai sha rai nga ai. Yesu Hkristu a tengman ai lam hte kabu gara shiga hpe hkaw tsun shachyam shabra na matu mara shaga la hkrum ai ni anhte rai nga ga ai. Kasa Pawlu gaw kam sham ai Ehpesu hpung masha ni hpe tsun ai hta, shanhte yawng Hkristu hta rai nga sai hte maren, Hkristu mung shanhte hta rai nga sai. Dai majaw wenyi gasat gala majan a matu mara hkyen lajang ai lam ni hpe galaw ra sai, nga ai.

Karai Kasang gaw hpyen gasat na matu Shi a amyu masha ni hpe shaga nga ai. Anhte a gasat gala ai gaw, asai yan ashan hpe n re ai sha, du agyi ni hpe mung, ahkang aya lu ai ni hpe mung, ndai sin mak nga ai mungkan a hpung dagu rawng ai ni hpe mung, sumsing lamu lahta tang e nga ai, n hkru n hkra ai nat a luksuk ni hpe mung, gasat gala nga ga ai (Ehpesu 6:12). Bawnu hte myit mang ai lam, masin salum hte wenyi a lapran hta gang dun gang jen rai nna gasat hkat nga ai gaw sape shagu hkrum katut ai majan pa rai nga ai. Dai shara kaw nna myit ru myit yak ai lam, dingkren ai lam, myit hki lit li ai lam ni prut pru ai shara mung rai nga ai. Anhte a myit mang ai lam hte galaw ai arawn alai

KARAI KASANG A HPYEN HKING

ni gaw, kraw kata e rawng nga ai madu lahkawng a hkang shading ai lam hta madung dat nga ai. Dai lahkawng gaw aten shagu langai hte langai dang manga lu na matu majan baw gasat nga ma ai. Masha langai gaw hkum hkrang, myit masin, wenyi ngu ai hte shachyaw da nga ai. Ndai lam masum hpe hkum shan, myit jasat, myit masa, myit kata hkam sha ai lam, masha a myit gindai masin salum ngu nna lachyum jat shaleng da nga ai. Anhte a hpyen wa mung dai lam masum hpe shading nna gasat gala ai lam galaw nga ai.

Wenyi majan hta anhte hkrai sha rai nga ga ai ngu myit la chye ga ai. Hkum hkrang langai sha rai nga ai nawku hpung mung wenyi majan hta gasat gala lawm nga ai hpe anhte myit n dum, malap kau chye nga ga ai. Anhte hpe gasat ai hpyen wa a yaw shada lam madung gaw daw hka wa shangun nna, gasat shamyit la na hte, nawku hpung hta na Hkristan hpyen la ni shada nhtang gasat gala hkat shangun na hte, nawku hpung hpe jahten shabya kau na matu rai nga ai.

Ndai laika buk hta lang da ai ga lami n kau mi gaw Chyum mungga hta mung mu lu ai sha n ga, anhte a shani shagu na sak hkrung lam hta awng dang ai lam hpe magra jum tek lu hkra garum ya lu nga ai. Ndai ga si ni hpe kachyi mi jat nna lachyum sung ai hku chye na ai shaloi, Hkristu a sape langai hku nna sasana magam amu hta gara hku shang lawm lu nga ai hpe hpyen hpyen pa pa mu mada wa lu na rai nga ai.

KARAI KASANG A HPYEN HKING

Ga si ni

Hpyen ma: hpyen majan hta gasat gala ai hpyen la, ninghkap gasat ai wa, htim gasat ai wa.

Hpyen majan: gasat ai, htim gasat ai, ninghkap gasat ai, man hkrum katut ai, ningdat hkat ai, majan, majan mahpang, gasat gala lam, masa n bung hkat ai, manghkang, shingjawng ai, hkying hkat ai, gang bang majan.

Daru magam: atsam madung, dang di lu ai atsam, n-gun, atsam ningja, gindai atsam, ninggawn atsam, uphkang atsam, up hkang ai, up ai, lak san ahkaw ahkang.

Rawt tsap: adingjan tsap ai, rawt ai, shara, tsang madang, n-gun dat ai, madu ai, seng ang ai, tara shang, jum tek da ai, lu la ai, dang kau ai, nan nan, grin nga ai, ga sadie dung ai, hkam jan lu ai, mahkrum madup, madi shadaw ai.

Akyu hpyi ai: matut mahkai ai, nawku akyu hpyi ai lam, akyu hpyi ga, gahti galai kyu hpyi ga, hpyi nem ai lam, hpyi lajin ai lam, lajin laroi ga.

Dat kasa: sumtsan kasa, ningtau, sumtsan salang, mayun dat kasa, hkring mang, kasa.

Da da ai magam: lai len, masa, yaw shada lam, sawn magam bungli, lai masa, myit masa.

KARAI KASANG A HPYEN HKING

Lahta na shaleng dan ai ga lami ni hpe chyena lu sai majaw, Ehpesu 6:10-20 hta na chyumga hpe matut hkaja mat wa yu ga.

Ya kaw nna dai Madu hte, shi a n-gun marai a atsam hta e, n-gun lapyin rawng nga mu. Nat e maw ai hkalem hkalau ai lam hte hpe nanhte manga kau lu myit ga, Karai Kasang jaw da ai hpyen hking nlang hte hpe bu hpun dagraw nga mu. Kaining rai nme law, anhte a gasat gala ai gaw, asai yan ashan hpe n re ai sha, du agyi ni hpe mung, ahkang aya lu ai ni hpe mung, ndai sin mak nga ai mungkan a hpung dagu rawng ai ni hpe mung, sumsing lamu lahta tang e nga ai, n hkru n hkra ai nat a luksuk ni hpe mung, gasat gala nga ga ai. Dai re ai majaw, n hkru n hkra ai nhtoi hta nanhte ban hkum kau lu nna, lam shagu hte hpe shangut nhtawm, lahpran tsap nga lu myit ga, Karai Kasang a hpyen hking nlang hte hpe lang dagraw nga mu. Dai rai nna, nanhte a nshang hpe teng man ai hte kyit nna, ding hpring ngu ai sinda magap hpe dagap nhtawm, ngwi pyaw shabyin ai kabu gara shiga hkaw tsun na jin jin rai nga u ga, lagaw hta kyepdin din let, lahpran tsap nga mu. Dai hta n-ga, nhkru n hkra ai wa a wan pala nlang hte hpe sat dang kau lu na, makam masham ngu ai n-gang hpe lang kahtap nga mu. Hkye hkrang la ngu ai hpri gup chyawp hpe chyawp nna, Karai Kasang a mungga ngu ai Wenyi a ntawng nhtu hpe, a hpye nga mu. Ahkying ladaw shagu hte hta e, akyu hpyi nna hpyi nem ai amyu myu hte, dai Wenyi hta hpyi nga nna, a maja nga let chyoipra ai ni nlang hte a matu mara n-gun n yaw ai sha, tut tut ahpyi nga mu. Dai kabu gara shiga a jaw

KARAI KASANG A HPYEN HKING

e, hkang hkyihkyang hte hkang da ai kasa ngai rai nga ti mung, dai kabu gara shiga a sumg htum ai lam hpe nden ja ai myit hte shana ya lu nna, ngai mai tsun ai hte maren n hkrit n kang ai sha tsun dan lu hkra, nye a n-gup hpaw ai shaloi, tsun dan lu na mung sumtu, ngai hpe jaw ya u ga, nye a matu mung akyu a hpyi nga mu.

Ndai chyumga hta na ahkyak dik ai ga yan lahkawng hpe anhte a myit masin hta e matsing sum hting da na lajin mayu nngai. Ndai chyumga gaw Hkristu a sape (sh) Hkristu a hpyen ma langai a lam hpe adan aleng tsun dan da ai hte anhte mung dai hte maren hkawm sa wa lu u ga myit mada nngai.

Langai

“ Dai Madu hte, shi a n-gun marai a atsam hta e, n-gun lapyin rawng nga mu,”

Lahkawng

“ nanhte manga kau lu myit ga”

Ndai chyumga daw hta Hkristu a sape hpyen ma ni gaw, Hkristu a Mungdan a matu mara gasat gala ai hpyen majan hta rai nga ai. Anhte a atsam hte n rai, Yesu Hkristu a atsam hte lahpran tsap nga ra ai. Ndai lam gaw magrau grang ai myit hte lahpran tsap nga na matu Karai Kasang Yawshu hpe tsun ai ga hte hpan langai sha rai nga ai (*Yawshu 1:6, 7, 9 & 18*). Dai aten hta e Yawshu gaw Karai Kasang a amyu masha ni hte rau ndat da ai mung de shang kabye na matu Yawdan hka hpe rap na hkyen taw nga ai aten re. Egutu mung kaw nna Karai Kasang shanhte hpe hkye mawai shaw

KARAI KASANG A HPYEN HKING

la ai hte, ga sadie jaw da ai mung de shang kabye kasat madu la na matu rai nga sai. Karai Kasang anhte hpe jaw da ai ga sadie law law nga ai. Dai ga sadie ni anhte hta e dik wa u ga, pru sa nna gasat na awng sharawng ai myit anhte hta n rawng ai rai yang, dai ga sadie ni gaw anhte a matu n rai nga ai.

Anhte ndai chyumga hpe sawk sagawn hpang wa ai hte rau, ndai laika a shingdu labau hpe shawng gawn yu ga. Kasa Pawlu ndai laika hpe kadai ni hpe yaw shada nna ka ai, hpa majaw ka ai ngu ai lam hpe shawng madung dat nna yu yu ga.

Ehpesu nawku hpung gaw Asha Maina (ya Turaki mung) e rai nna, Ladoki hte Kolose mare ni hte htep nga ai. Roma Hkawseng mungdan a ahkyak ai ka ang panglai (Mediterranean) hkinggau sang hpaw daru langai rai nga ai. Roma ni a nat karai num Diana hpe shagraw sha a da ai ram ram kaba ai htingnu gaw de da ai shara rai nga ai (*Kasa 19:10*). Masum ning daram Kasa Pawlu a kabu gara shiga htawn shabra ai ginjaw shara hku nna mung shatai lai wa sai. Ndai laika hpe Roma mung e Kasa Pawlu bawng dung nga yang AD 60 ning daram hkan e Kolose ni kaw shagun dat ai laika hte rau ka ai rai na re ngu sawn jahtuk la lu ai.

Ehpesu laika a yaw shada lam madung gaw, Karai Kasang a htani htana masing hte matsan dum lama ai lam ni hpe htinggrum nna sape ni grau chye na wa na matu garum ya na lam rai nga ai. Nawku hpung gaw Karai Kasang hte kanawn mazum na hte sape langai hte langai kanawn mazum ai lam ahkyak ai hpe chye na na matu mung yaw shada ai lam hta lawm nga ai. “Hkristu hta e” masha tai nga lu ai a marang e lu la ai kaba dik ai shaman chyeju

KARAI KASANG A HPYEN HKING

hpe laika hti ai wa chye na u ga, dai lam hpe npawt dat nna shawng ka da nga ai. Nawku hpung hta na sape ni yawng gaw, Hkristu hta e kadai ni rai nga ai hte dinghta ga ntsa e sak hkrung ai a yaw shada lam ni gaw hpa rai nga ai lam hpe atsawm sha chye na myit hkawn na matu Kasa Pawlu aja awa akyu hpyi wa sai. Shi tsun ai gaw shawng nnan e Karai Kasang hte rau dung ra ai, dai hpang e Karai Kasang hte rau hkawm sa ra ai, de a akyu ara gaw Yesu Hkristu hta e ngang ngang kang kang lahpran tsap nga lu ai lam rai nga ai. Ehpesu laika a ka-ang daw hta e tsun da ai lam gaw, anhte kam sham ai ni shada kaning rai shingdep shingtau nna sak hkrung nga ra ai lam hte, kam sham ai dinghku masha ni hte mung galaw ging ai lanu lahku ai sasana amu hpe galaw na lam tsun da nga ai.

Kasa Pawlu ka ai laika langai mi hta anhte kahtap jat myit yu na matu lam langai hpe myit dum lu nngai. Dai gaw shi hte rau bungli galaw ai manang, jawng ma Timohti hpe Hkristu a hpyen ma kaja tai ai lam hte seng nna ram ram shaleng nna tsun da nga ai. Timohti hpe tsun ai gaw:

Dai re ai majaw, ngai sha e, Hkristu Yesu hta e rawng ai chyeju hta, n-gun lapyin jat wa lit ga. Sakse law law a man e ngai kaw na nang na la sai lam hte hpe, masha kaga hpe sharin achyin chye ai kangka re ai masha hte kaw htawt ap ya u. Hkristu Yesu a hpyen ma kaja zawn, ru tsang jawm hkrum ga. Hpyen amu gun hpai ai wa kadai mung, tinang hpe hpyen hpung hta shalawm la ai wa a myit htuk lu hkra, ndai aprat na arai ni hta tinang hkum hpe ahkang abai shangun ma ai n rai (II Timohti 2:1-4).

KARAI KASANG A HPYEN HKING

Nawku hpung a hpyen ma ngu ai wa gaw Wenyi majan hpe gasat na matu hking jahkum shatsup nna hkyen lajang shajin da ai wa rai nga ai. Anhte shani shagu hpyen gasat nga ga ai, asak hte si ai langai ngai hpe jaw ya ai majan ni rai nga ai. Ephesu 6:10-20 chyum ga daw kaw nna anhte mu mada sharin la lu ai lam gaw, anhte a shani shagu na sak hkrung lam hta nachying wa akyu shabyin ya lu ai tengman ai lam (6) rai nga ai. Na a yaw shada ai lam hte pandung gaw, “**Karai Kasang a hpyen hpung (hpyen dap) hta na hpyen ma langai tai nga na matu hkyen lajang da na lam rai nga ai**”.

I. Hpyen ma wa a n gun (Dawkaji 10)

Hpyen ma langai a atsam kanang na pru wa na rai ta? Man shagu kaw nna du shang wa nga ai hpyen law law hpe gasat ai hpyen majan hpe kaning rai dang gasat manga lu na rai tai? nga nna ga san san mayu na re. De a mahtai gaw anhte a myit masin e shanu nga ai wa kaw nna pru wa ai. Hkristu a shaga ai hpe hkap la nna, Shi hpe anhte a hkyela Madu ngu nna anhte a myit masin kata e chyinghka hpaw hkap tau la ai hte rau, Chyoi pra ai Wenyi gaw anhte a kata e shara la sai. Anhte man ang gasat gala ra ai majan a matu, anhte hpe atsam jaw na, shalan shabran na, lam woi na, sharin achyin ya na gaw Chyoi pra ai Wenyi nan rai nga ai. Mungdan lahkawng gasat gala ai majan rai nna, dai majan gaw Hkristu shi a Nawku hpung hpe shalun la na matu bai yu sa ai aten du hkra rai nga ai. Dai aten hta she hpyen ni yawng hpe htani htana gyit sharawng nna jahten shaza kau na rai nga ai. Chyoi pra ai Wenyi gaw anhte hpe sasana magam amu a matu mara atsam jaw

KARAI KASANG A HPYEN HKING

na re nga nna Kasa Pawlu tsun da nga ai. Shani shagu anhte a myit masin hta e du shang wa na matu hpyi jashawn ai shaloi she, dai atsam ningja gaw du shang wa lu ai lam Ehpesu hpung masha ni hpe tsun da wu ai (*Ehpesu 5:18*).

Masha hpe hkwi ai ni tai na matu Hkristu gaw masha shagu shi a hpang hkan nang na matu shaga nga ai. Pru sa nna masha shagu hpe nawku hpung de shang wa na matu saw shaga, shadut jahkat na magam gun law law ra kadawn nga ai. Raitimung hpyen wa a sharawng awng ai lam gaw masha a sak hkrung lam ni si ai hkaraw hta e hten za mat na hpe ra nga ai. Hkristu anhte hpe shaga la ai hte rau, sasana magam amu gun hpai na hte ru yak ai lam ni hpe dang manga kau na matu ra kadawn nga ai atsam ni hpe jahkum shatsup jaw ya na gaw kam shut shara n nga ai. Anhte hta e rawng nga ai wa gaw mungkin hta e nga nga ai wa hta grau kaba nga ai, nga nna mung shi anhte hpe tsun da nga ai (*I Yawhan 4:4*). Anhte hpe hpyen ai wa nga ai, dai wa gaw Madu Yesu wudang ntsa e galaw ai amu a marang e gasat gala hkrum sai wa re. Shi a hkaw kau ai a sai gaw anhte a yubak mara ni hpe shatsai kau ya nga ai. Anhte ni shi a mying nsang hpe shaga nna anhte a yubak mara ni hpe yin la tawng ban yang shi a kasha ni anhte tai wa lu na re.

Ndai shaleng dan ai lam gaw balik pyada la langai hte bung nga ai. Shi lu ai ahkang aya gaw shi a na n rai, shi hpe shangun dat ai wa kaw na rai nga ai. Balik pyada langai tai lu na matu lam amyu myu hku nna sharin achyin shaman shakyang ai lam hpe hkam la ra ai. Shi amu magam gun na matu pru sa ai shaloi, mungdan a ahkang aya lu ai ni shi a shingdu e nga nga ai hpe asan

KARAI KASANG A HPYEN HKING

sha chye da u ai. Hkristu a hpyen ma anhte hta mung Hkristu a daru magam ahkang aya nga nga ai. Shi hpe Kawa Karai Kasang ap ya ai ahkang aya hpe, ya anhte hpe shi bai ap ya nga ai lam sape ni hpe tsun da nga ai (*Mahte 10:1*).

Daw kaji 10 hta dai Madu hte, shi a n-gun marai a atsam hta e n-gun lapyin rawng nga nna, shi hte rau hkawm sa n na shi a magam amu hpe gun hpai nga mu nga nna Kasa Pawlu tsun da nga ai. Kam sham ai anhte a kata hta nan Hkristu a ahkang aya rawng nga ai. Shi a mying ningsang hte tsun shaga, amu bungli galaw ai shaloi, dai hpyen wa gaw tsan tsan de yen mat wa sai. Yesu Hkristu ngu ai hpyen jau bu wa a npu e anhte daw jau nga ga ai hpe aten shagu myit dum ra nga ai. Yawshu gaw Yerihko mare kaba hpe shang kasat ai lam n galaw shi yang, n-gun atsam hte hpring ai sumsing hpyen jau bu wa hte hkrum shaga wu ai.

Ya Yawshu gaw Yerihko makau e nga nga ai shaloi sharawt mada yu yang, yu u, nhtu shaw shada lang nna shi hte man ap rai tsap nga ai wa langai mi nga nga ai: Yawshu gaw shi hpang de sa wa nna, Nang gaw anhte hpang maga na rai n ni? Gumlau hpyen hpang maga na rai n ni? ngu nna san yu wu ai. Dai wa chyawm gaw, N rai, Yehowa a hpyen laba up ai bu rai nna ya sa wa ring ngai, ngu wu ai. Shaloi Yawshu gaw ga e ding nyawm nawku let, Nye a Madu e, na a mayam wa hpe hpa tsun mayu n ta? ngu wu ai. Yehowa a hpyen laba up ai bu wa gaw, Yawshu hpe, Na a kyepdin raw u; nang kabye ai ga gaw chyoi pra ai ga rai nga ai, nga ai. Yawshu mung shingrai galaw wu ai (Yawshu 5:13-15).

KARAI KASANG A HPYEN HKING

Hkristu a sape tai lu ai gaw kade wa tsawm htap nga a hka! Wenyi majan hta e anhte hkrai n rai, anhte hte rau hkawm sa nga ai lamu kasa ni hte rau rai nga ai. Anhte a Hkaw Hkam Hkristu a hpyen hpung hta sharawng awng ai hte shang lawm kasat na gaw ahkyak dik nga ai.

Hpang jahtum nhtoi na anhte a myit masin majan a lam hpe Shingran laika hta adan apra mu mada hkra ka shaleng da nga ai. Dai majan a n pawt gaw anhte kadai hpe nawku dawjau na ngu ai lam rai nga ai. Satan gaw shi a hkan sa ai lam gaw tengman dinghpring nga ai nga nna masha a myit masin hpe lu la hkra hkalem taw nga ai. Chyum laika hta ayai aya, hten za mat ai hte si htum mat ai lam gaw satan a lam rai nga ai nga nna tsun da nga ai. Na a wenyi shi a lata hta myit mu myit hkut hte ap da na matu, masu magaw hkalem hkalau ai lam ni hte shakut nga ai. Karai Kasang ra sharawng ai lam gaw, na asak hte kam sham ai myit Shi hta ap da na hte htani htana nang hpe Shi bau sin na lam chye shangun mayu nga ai. Yesu a num ningnan, nawku hpung mung ningdat kasat gala ai lam law law hpe hkrum kadup nga ai. Dai lam byin hkrum ai gaw teng man ai Karai Kasang a mungga lam hta jung noi na malai hpung a rit kawp tara ni hta ahkang abai nga ai majaw rai nga ai. Kaning re ai npawt hkridun hta jung noi nga ai hpe chye lu na matu, chyam dinglik ashun awam ai lam kadai mung hkrum na sha re. Karai Kasang hte marai hkumdek kanawn mazum matut mahkai ai hkridun npawt hta lai nna ngang dik ai hkridun n nga ai. Dai kasat gala ai majan gaw hkrit tsang hkrit kahpra ai lam amyu myu hpe shabyin ya nga ai. Raitimung lam magup hpe awng dang ai wa dai Madu hpe kam sham manoi nga ra ai (*I Yawhan 4:4; Yawhan 16:33*).

KARAI KASANG A HPYEN HKING

II. Hpyen ma wa a ninghkap majan (Daw kaji 11-13)

Shani shagu na yak hkak ai lam ni hpe hkrai madung tawn maju jung nga nna, wenyi majan hta shang lawm gasat nga ai hpe n dum kau dat ai lam sape ni hta byin chye nga ai. Kadai hpe raitimung hka bra, daw hka, dang manga kau, jahten shaza kau na galaw nga ai wa gaw anhte a hpyen majing rai nga ai. Hkrat sum ai sak hkrung lam hta nang sak hkrung nga na hpe shi ra sharawng nga ai.

Anhte a gumlau wa hpyen satan gaw kadai hpe mahtang mayu kau lu na nga shabam nga ai hkanghki zawn rai nga ai. Anhte hpe hkrit tsang ai sak hkrung lam hta nga na ra sharawng nga ai (*I Petru 5:8*). Gara gaw jaw ai n jaw ai hpe n chye lu ai sha sak hkrung lam hta rawng nga shangun ai. Dai hpyen wa gaw hkalem hkalau, masu magaw ai yawng a daju madu rai nga ai. Marawn shabam ai hkanghkyi gaw nam shan hpe kawa sat sha ai n rai, marawn shabam ai nsen hpe na ai nam shan gaw hkrit nna h prawng kagat ai shaloi, gawp hpum nna la nga ai hkanghki yi a man de h prawt rai nna, kawa sat sha ai hkrum nga ai.

Wenyi majan hpe awng dang ai lam lu la na matu anhte a hpyen bu wa hpe kam sham ai myit rawng ra nga ai. Anhte a hpyen bu wa anhte hpe rawt tsap nna hpyen wa hpe ninghkap na tsun ai hte rau hkan galaw ra ai. Yesu a asai hte anhte hpe ka-up da sai majaw, dai gaw anhte a dinghpring ai lam tai wa nna hpyen wa hpe anhte dang manga kau lu na lam Yesu chye chyalu re. Anhte a myit kraw hta e aten shagu myit dum nga ra na gaw, *anhte a kata e*

KARAI KASANG A HPYEN HKING

rawng nga ai wa gaw, mungkan hta nga ai wa hta grau kaba nga ai (I Yawhan 4:4).

Ngang ngang tsap lu na matu ngang grin ai ga ntsa e rai ra ai. Na lagaw ni hpe de a ntsa e kabye shangang nna man hkrum gasat ra ai hpyen majan a matu chyip chyip rai nga ra ai. Hkrit ai myit hte nhtang mat wa na n rai. Hkristu jaw ai Karai Kasang a hpyen hking hpe sumraw la nna, atsam marai ma hkra hte hpyen wa hpe gasat gala ra ai.

Kalang lang hpyen majan hta e tinang hkrai sha gasat ra ai zawn nga ai aten nga na re. Raitimung Hkristu hte Chyoi pra ai Wenyi gaw nang hte rau rai nga ai ngu ai hpe myit dum na lam mung ahkyak dik nga ai. Hpyen wa hpe rau jawm kasat na matu sape hpu nau ni hpe saw shaga nna myit hkrum lam tam na hpe mung nhkrit ntsang galaw ang ging nga ai. *Sin masum kapyawn nna rit ai sumri hpe, aloi sha gang dut kau lu ai n rai* (Hpaji Ningli 4:12).

Nawku hpung gaw Hkristu a hkum hkrang rai nga ai hte maren, kam sham ai hpung masha shagu gaw Chyoi pra ai Wenyi a marang e langai hte langai ading tawk matut mahkai nga ai. Anhte yawng lahkrip ra ra, garum shingtum hkat nna hpyen wa hpe jawm gasat ra ai. Hpyen wa lagu la mat wa ai ni hpe bai nhtang lu la hkra mung galaw ra ai.

Sawn tak n lu ai hpyen man law law hpe hkrum kadup na rai nga ai. Hpyen wa gaw lam amyu myu hku nna anhte a asai ashan hpe mung wenyi hpe mung gasat gala na rai nga ai. Chyum

KARAI KASANG A HPYEN HKING

laika hta ndai wenyi majan a lam ni hpe shaleng dan ai lam Shingran laika hta e mu hti lu nga ai. Ndai majan gaw anhte kadai hpe nawku dawjau nna kade a hpang hkan nang na ngu ai hpe garan ginhka kau ya na majan mung rai nga ai. Ndai majan gaw Karai Kasang a Sagu Kasha hte Anti Hkristu ngu ai matse labye satan a lapran e byin ai majan rai nga ai.

Hkristu a Nawku hpung kata kaw nan shang nna kasat ai lam mung satan a hpyen man langai rai nga ai. Sape ni Karai Kasang a mungga hta tengman ai hku jungnoi ai lam n nga ai majaw, hpyen wa hpe hpung kata de shang na lam hpaw ya dat nga ai. Dai gaw hkum shan shada kasat hkat ai mawng ana hte bung nga ai. Nawku hpung kata hta mung, nawku hpung a shinggan hta mung hkalem hkalau ai lam law htam wa na hpe Chyum laika hta anhte hpe tsun dan da nga ai.

Masu magaw hkalem hkalau ai hku nna dawhka bra wa na matu hpyen wa gaw shang bang wa na re. Hkum shan hte wenyi hpe ashun shamawt ai aten du wa na re. Sagu hpyi hpun da ai sawt ai tara sara ni hpe hpyen wa dat bang dat na ra ai. Shinggan hta e sagu a nsam rai nga tim kata e gaw nhkru ai chyahkyawn a myit masin rawng nga ai. Nkau mi gaw nawku hpung hpe woi ai sagu rem wa, hpung up ni pyi rai ma ai. Shanhte galaw ai lam gaw Hkristu ra sharawng ai lam re ngu shadu la hkra galaw na ma ai. Raitimung Hkristu tsun ai ga gaw, *Ngai nanhte hpe n chye nngai*, sagu hte bainam hpe garan ginhka ai ga shadawn (*Mahte 25:37-46*). Chyum mungga hpe tengman ai hku chye na nna, akyu hpyi ai hta nsim nsa re ai ni chyu sha, shai ai lam ni hpe chye ginhka lu na re.

KARAI KASANG A HPYEN HKING

Mungkan ga nan mung ningdat ai lam law law hpe hkrum katut nna yawn madai taw nga ai. Lamu ga mung ashun awam wa, nnang nawn kaba byin, kawsi hpang gara ai hte ana zinli law law byin pru wa na re nga nna anhte hpe tsun da nga ai. Mungdan langai hte langai gasat gala hkat ai hte simsa lam tam ai ni mung nga nga ai. Langai hte langai ap hkat nna, kanu kawa hte kasha ni myit n rum hkat na lam tsun da nga ai. Mungkan masha yawng kaning re ai jahpu manu hte mung galai kau lu ai simsa lam hpe langai sha re ai mungkan uphkang hpung hku nna jaw lu ai zawn Anti Hkristu gaw galaw nga ai. Mungkan ting hpe uphkang lu ai lam hpe sharawt dat nna, aten kadun simsa lam hpe jaw ya nna, dai aten lai ai hte gyit hkang ai lam hte jahten shaza ai lam hpe shabyin na matu satan gaw masing gran nga ai. Ninggawn tawa Karai Kasang hpe nan jahten shaza na nga lamu de lung na rai nga ai. Dai gaw hpang jahtum nhtoi hta hpyen wa grang dakat ai lam nan rai nga ai.

III. Hpyen ma wa a Hpyen Hking (Daw kaji 14-17)

Hpyen hking gaw yu maya palawng zawn n rai, daw chyen shagu gaw hpyen majan hta ninghkap kasat gala na hta asung jashawn ai lam hpra rawng nga ai. Hpyen hking langai hkrai hpe yaw shada ai lam nnga ai sha lang yang, Karai Kasang a hpyen hking hpe sumraw lu na ahkang anhte hpe Hkristu jaw na n rai nga ai. Hpyen hking daw chyen shagu gaw hpyen majan hta hpyen ma lang na matu rai nga ai. Hpyen hking daw chyen shagu a yaw shada ai lam gaw tinang hkum makawp maga na hte Karai Kasang

KARAI KASANG A HPYEN HKING

a hpung shingkang hpe shadan shadawng ai lam hta atsawm sha jai lang na matu rai nga ai.

Lawu de madun da ai jahpan ni gaw hpyen ma langai a hking hte laknak ni rai nga ai.

- | | |
|--------------------|--|
| A. Shingkyit | Tengman ai |
| B. Sinda magap | Dinghpring ai |
| C. Hkyepdin | Ngwi pyaw simsa lam ngu ai Kabu
Gara shiga hkaw tsun na shajin ai |
| D. Hpri gup chyawp | Hkye Hkrang la ai |
| E. N-gang | Makam Masham |
| F. Ntawng nhtu | Karai Kasang a mungga ngu ai
Wenyi |

Daw chyen langai hkrai a lam hpe hka ja yu ga.

a. **Hkye Hkrang la ngu ai hpri gup chyawp**

Gup chyawp gaw anhte a baw hpe makawp maga na matu re. Anhte a hkum hkrang daw shan shagu hpe hkang ya ai anhte a myit mang ai lam machyu ai shara mung rai nga ai. Daw dan ai lam yawng prut pru ai shara mung re. Hkum hkrang ting a shamu shamawt ai lam yawng hpe reng hkang ai shara mung re. Jaw ai

KARAI KASANG A HPYEN HKING

shut ai daw dan ai lam ni hpe shangai shapraw ai shara mung rai nga ai. Hpyen wa shang htim gasat mayu ai hpyen majan pa langai mung rai nga ai.

Hkye Hkrang la ngu ai hpri gup chyawp gaw anhte a myit sawn ai hte anhte a myit manawng hpe hten za ai kaw nna makawp maga la ai wenyi makawp rai nga ai. Anhte a myit sawn ai lam shut ai hte rau, shut shai ai amu bungli hpe si shapraw ai hkai li hpe jahkrat hkai dat ai hte bung nga ai. Dai majaw anhte a myit sawn ai lam ni hpe Hkristu a asai hte ka-up da ra ai. “Anhte myit mang ai hte maren anhte hta byin wa na rai nga ai” ngu ai ga malai hte bung nga ai. Masha shagu kaning rai myit sawn ra ai lam hpe Yesu shawa masha ni hpe sharin achyin da ai lam, Mahte laika hta mu lu nga ai. Ndai sharin achyin ai hpe “A lu ai Tara” ngu nna ga baw jaw da nga ai. Shani shagu anhte a myit masin wang kata de shut shai ai lam law law ru jahkrat bun ai hte maren, daw dan ai lam law law hpe daw dan galaw sa wa ra nga ga ai. Dai re ai majaw, anhte a sak hkrung lam hpe shabyin ya ai anhte a myit sawn ai lam ni hpe mungga hte Yesu Hkristu a Wenyi hte jen dinglik ai lam hpe galaw lu na matu dai hkye hkrang la ngu ai hpri gup chyawp hpe chyawp da ra ai. Galati hpung masha ni hpe Kasa Pawlu gaw sadi jaw shadum ai lam hta, tinang galaw ai amu magam ngu ai hkai li hpe gat hkai ai hte maren aten ladaw du ai shaloi, dan la shu la ra na lam (*Galati 6:9*) hta tsun shadum da ai hpe mu lu ai.

Sape shagu hpe Hkristu ra sharawng ai lam gaw simsa ai sak hkrung lam hta hkawm sa na lam rai nga ai. Mungkan sutgan hte arung arai gaw anhte hpe simsa lam jaw ya lu ai n rai. Yesu

KARAI KASANG A HPYEN HKING

Hkritu hte Shi a mungga hpe maju jung ai myit masin chyu sha sim sa ai lam hpe jaw ya nga ai. ...*Chye chyang ai nyan yawng hta grau lai ai Karai Kasang a ngwi pyaw ai gaw, nanhte a myit masin hte nanhte a myit mang ai hpe, Hkristu Yesu hta e bau sin na ra ai* (Hphilipi 4:7). Ndai lam hpe myit mada shara n nga, myit htum myit si lam hte hpring ai mungkan gaw chye na lu na n rai. Sape ni gaw mungkan a matu sakse lakung lakap ni tai na mai kaja dik ai lam rai nga ai. Hpri gup chyawp gaw anhte a myit sawn chye ai myit mang lam hpe makawp maga ya ai re majaw, akyu hpyi ai hku nna dai hpe shani shagu sumraw da ra nga ga ai.

b. Dinghpring ngu ai sinda magap

Sinda magap gaw masha langai a ahkyak dik ai hkum hkrang kata na daw shan ni hpe makawp maga da ya nga ai. Dai gaw du kaw nna ginshang du hkra makawp maga da nga ai. Man yawng ai chyen hpe makawp maga da ya ai re. Hpyen wa hte gasat gala ai shaloi, hkum hkrang a ahkyak dik ai daw shan ni hpe hpyen wa hpe n mai shadan dan nga ai. Dai daw shan langai ngai hta e hpyen wa gap dat ai pala jung shang mat ai shaloi, si ai lam gaw dai hkum hkrang hta byini wa mai nga ai. Asai ashan hkum hkrang hta mung wenyi hkum hkrang hta mung masin salum gaw ahkyak dik nga ai. Dai gaw hkum ting hta ra kadawn ai asai hpe shachyam shabra ya ai daw shan mung rai nga ai.

Wenyi hkum hkrang hpe makawp maga na matu sumraw ai hking hku ni hpe hpyen hking ngu nna ga shadawn lang ai hte lachyum shaleng da ai lam rai nga ai. Anhte a masin salum gaw Hkristu Yesu shang shanu nna, anhte hku nna shi a amu magam ni

KARAI KASANG A HPYEN HKING

hpe galaw shatsup na awng sharawng ai shara mung rai nga ai. Anhte a masin salum gaw yubak arawn alai hpe shangai chyinghkai jung noi npawt dat ai shara mung re. Anhte kaning re ai magam amu mi galaw tim yubak kap ai ni hkrai rai nga ga ai. Anhte a kaja dik ai lam, anhte a dinghpring ai lam yawng, agang chyalang re ai hpun nba hte bung nga ai (*Esaia 64:6*). Karai Kasang anhte hpe yu dat ai shaloi, hkrang shaw la n hkrum shi ai kata na masha hku mu nga ai. Yubak mara nga ai shara hta Karai Kasang hte kanawn mazum ai lam n lu galaw nga ai. Anhte a yubak mara a matu mara Hkristu mungkan ga de yu sa nna anhte a malai wudang ntsa e si hkam sai. De a majaw Hkristu hpe Hkyela Madu ngu nna yin la, hkap la kam sham ai hte rau yubak kap nga ai anhte hpe shi a matsan dum lama ai asai ngu ai dinghpring ai lam hte kayawp ka-up kau ya sai. Anhte a masin salum hpe Hkristu a asai hte kayawp makai kau sai. Hkristu Yesu hta anhte gaw masha ningnan tai wa saga ai (*II Korinhtu 5:17*).

Karai Kasang anhte hpe yu ai shaloi, anhte hpe ka-up da ai Hkristu a dinghpring ai lam hpe sha mu ya sai. Hpyen wa anhte hpe kasat ai shaloi anhte hpe Hkristu a asai hte kayawp da ai Hkristu a kasha ni hku nna sha mu mat sai. Hpyen hking hpe sumraw da sai majaw hpyen wa hpe dahpran tsap nna man hkrum ninghkap kasat lu sai. Anhte a shingdu na shingma gaw hpaw malang nga ai. Dai majaw anhte shingdu kayin dat ai hte rau hpyen wa gap dat ai pala hpe shingdang lu ai lam n nga sai. Kalang marang hpyen wa gaw anhte a shingma hpe nhkyi hte galun abraw na matu anhte a nta masha, kahpu kanau, sape hpunau ni hpe jai lang ai shaloi laja lana machyi makaw ai lam hkrum hkra chye ga ai. Ndai zawn re ai gasat gala hkrum ai lam gaw grai maroi nni hpa

KARAI KASANG A HPYEN HKING

rai nga ai. Dai lam ni hpe tau hkrau chye lu ai lam n nga ai. Anhte a hpaw nga ai shingma hpe kam sham ai hpu nau shada da makawp maga hkat nga ra ai. Raitim ndai lam ni n byin wa ai aten mung law law rai nga ai.

Hkristu a dinghpring ai lam gaw anhte hpe yubak hte si ai sak hkrung lam kaw nna hkye mawai shaw la nga ai. Dai lam gaw anhte hpe mungkan hte jahka da ai lam rai nga ai. Masha ni anhte hpe yu ai shaloi mungkan a arai ni hte ka-up da ai lam n nga ai hpe mu nna, mungkan a sak hkrung lam hte shai nga ga ai hte maren Hkristu a dinghpring ai hte sak hkrung lam ningnan hta matut hkawm sa nga ra ai (*Ehpesu 4:24, I Petru 2:24*).

c. Tengman ngu ai shingkyit

Tsaw ra ai myit hte tengman ai ga hpe tsun let amu magam galaw ai shaloi mung tengman ai shingkyit hpe kyit da ra ai (*Ehpesu 4:15*). Tengman ai lam gaw anhte tsun shaga ai, galaw ai amu magam a npawt hkri dun tai nga ra ai. Sape law law hkap la da ai sharin achyin ai lam gaw, akyu yawm shangun ai lam n nga ai masu ai ga hpe gaw tsun mai ai nga nna hkap la ma ai. Karai Kasang a mungga hpe hkan sa ai lam hta jaw ai shut ai lam lakkawng hta lai nna lapran shara n nga ai hpe myit dum da ra ai. *Tengman ai gaw nanhte hpe shalawt dat na ra ai* (Yawhan 8:32) nga nna Madu Yesu sape ni hpe htet da nga ai. Karai Kasang a tengman ai mungga anhte a masin salum hta ru jung nga nna dai gaw anhte hpe dawjau ai lam hta woi awn mat wa na rai nga ai.

KARAI KASANG A HPYEN HKING

Satan gaw nam mali e Yesu hpe sawt ai tengman ai lam hte gung lau u ai. Karai Kasang a myit ra ai lam hte nhtan shai mat hkra, chyumga hpe lang nna masum lang ting Yesu hpe Satan gunglau u ai. Ginru ginsa lam hpe koi kau ai Chyumga gaw tengman ai lam hpe n jaw ya nga ai. Karai Kasang a mungga tengman ai lam hpe Chyumga nhtoi hte anhte hti ra ai. Yesu gaw Satan a masum lang gunglau ai hpe hkrum ai shaloi, jaw ai hte tengman ai lam hte gasat ai shaloi hpyen wa sum mat ai.

Karai Kasang a hpyen hking gaw tengman ngu ai shingkyit hta e shangang shakang da nga ai. Kasa Pawlu a aten hta masha langai a rudi gindai gaw masin salum n rai. Shingkyit kyit ai shara gaw amyu matu mara shaprat shalat ai shara rai nga ai. Dai shara kaw nna shangai shalat ai lam amu shabyin dat nga ai. Tengman ngu ai shingkyit kaw nna nang shapraw shaprat dat ai lam ni gaw tengman ai lam hta sha rai ra nga ai.

Hkristu a sape ni gaw tengman ai sakhkrung lam hpe kasi madun ra ai. Madu Yesu gaw shi hkaw tsun ai dai tengman ai lam hte maren sak hkrung ai wa ngu nna masha ni hkap la chye na ma ai (*Luka 20:21*). Dai hte maren anhte mung shi a lagaw lahkam hpe hkan ra nga ai. Hkristu hte rau nawku hpung kata e mung, lam ntsa e mung rau hkawm sa nga ai lam rai nga ai. Tengman ngu ai a sape ni anhte tai nga ra ga ai. Anhte tsun ai, galaw ai lam yawng hta kam ging ai ni anhte tai ra ga ai (*III Yawhan 1:4*). Masu ai ga, sawt ai ga, daw chyen tengman ai ga tsun dat ai sape kadai rai tim, hpyen wa shi hpe gasat na matu sharawng awng hkra galaw dat sai rai nga ai. Dai majaw anhte yawng, *na la na matu lawan nga u ga; ga tsun na matu hkum tin nga u ga* (*Yaku 1:19*) nga nna Kasa

KARAI KASANG A HPYEN HKING

Yaku gaw anhte hpe htet da nga ai. Anhte tsun shaga ai ga ni hta jaw ai hte n jaw ai ni lawm ai majaw, anhte a sahhkrung lam hte anhte a makau grup yin e nga ai ni hpe wa ahtu hkra chye ai.

d. Kabu Gara Shiga ngu ai hkyepdin

Hkyepdin gaw lam hkawm ai shaloi, majan gasat ai shaloi anhte a lagaw ni hpe makawp maga ya nga ai. Ngang kang ai shara hta hkum hkrang ting ading jan tsap lu na matu garum ya nga ai. Tsap nga ai anhte a lagaw ngang kang ai lam n nga yang ngam ai hkum hkrang daw shan ni htim gasat hkrum na aloi sha rai nga ai. Anhte a lagaw gaw shara shagu de woi hkawm sa nga ai. Grai ahkyak ai mungga hpe kyem da ai hkum hkrang hpe shara mi kaw na shara mi de woi sa nga ai.

Ngwi pyaw simsa lam hpe jaw ya ai Kabu Gara Shiga ngu ai Hkyepdin hpe din da na matu anhte hpe tsun da nga ai. Madu Yesu gaw Karai Kasang a kasha rai nga ai hte mungkan ga de yu sa nna Karai Kasang a mungdan gaw shinggyim masha ni hta gaw de sai lam, Shi hpe hkap la ai ni kadai mung tsawra matsan dum ai, myit mada ai lam hte chyeju kam htaw hpe lu la na lam kabu gara shi ga hpe n dau sai.

Ningsin a hpyen ni hte wenyi hpe gasat gala ai hpyen majan hta hpyen ma langai hku nna gasat lawm ra ga ai. Rai ti mung yubak hte si ai lam hta sak hkrung nga ai masha ni hpe hkye mawai shaw la ai mungga hpe mung anhte gun hpai shachyam shabra ra ai. “Hkaw tsun ai wa n nga yang kaning rai na lu na ma ta?” nga nna Kasa Pawlu Roma hpung masha ni hpe tsun da ai.

KARAI KASANG A HPYEN HKING

Kahtap nna ...*Mai kaja ai lam kabu gara shi ga hkaw tsun dan ai ni a sat lagaw ni gaw, gade wa tsawm nga ma lu hka!*... (Roma 10:15). Hkristu a hpyen ma ni rai nga ai majaw Hkristu a Hkringmang dat kasa ni mung rai nga ga ai. Ndai dinghta mungkin hta Karai Kasang a mungdan a gawng malai tai ai ni rai nga ga ai. Karai Kasang hte httinglu httinglai ai mungga anhte hta e rawng nna, dai hpe gun hkawm gat shabra ai ni mung rai nga ga ai.

Ngwi pyaw shabyin ai kabu gara shiga hkaw tsun na jin jin rai nga u ga, lagaw hta kyepdin din let, lahpran tsap nga mu (Ehpesu 6:15). Ndai gaw sape shagu a matu sumsaw rai nga ai. Kabu Gara Shiga a tengman ai lam ni hpe atsawm sha sharin hkaja nna myit masin hta jahpring da ra ai. Ahkaw ahkang chying hka hpaw wa ai shaloi hkaw tsun na hte Kabu Gara Shiga a tengman ai lam hpe makawp maga lahpran tsap na jin jin rai nga ra ai.

e. Makam Masham myit ngu ai n-gang

Roma hpyen la ni lang ai n-gang gaw galu yang rai nhtu, ndan pala ni hpe makawp maga ya lu ai. Hpyen la langai mi hpe atsawm sha shingga ya lu ai arai langai re. Hpyen ma yawng hte gumhpawn dat ai shaloi dai n-gang ni gaw hpyen wa shang htim gasat na yak ai shakum tai mat nga ai. Ninghkap gasat ai hte htim gasat ai lam hta n-gang gaw n lang n mai rai nga ai.

Hpyen wa a gap dat ai pala, ningwut shapoi dat ai nlung, ri hte galun dat ai nhtu ni hpe ninghkap shingdang na matu hta mung n-gang hpe lang ra nga ai. Kasa Pawlu gaw sape ni hpe ndai grai hkrit tsang ra ai, ning wan hkawm nga ai hpyen satan wa a gasat

KARAI KASANG A HPYEN HKING

gala ai lam hpe makam masham ngu ai n-gang hte chyu sha shingdang kau ya lu nga ai lam tsun da nga ai. Lahta de tsun shaleng dan lai wa sai hte maren, anhte gasat gala nga ai hpyen majan gaw asai ashan majan n rai, wenyi majan rai nga ai. Hpyen wa gaw masu magaw, hkalem hkalau ngu ai lam ni hte kam sham ai sape ni hpe ga li ga law, mara mu hkat hkra shabyin ya ai machyu pala laknak hpe lang nga ai. Dai gaw hpyen wa a sawn tak n lu ai hkrit tsang ra ai laknak re. Sape ni a kam sham myit hpe shakya kau ya nna, kam shut ai myit hte hkrit tsang ai myit hta gang dun gang jen byin lu shangun nga ai hpe hpyen wa chye nga lu ai.

N-gang gaw majan pa hta e hpyen ma hpe shawng de sit nawt nna htim gasat na matu myit marai hpe jaw ya nga ai. Hpyen wa hpe ningkap na hte htingnut mat hkra gasat na matu mung garum ya nga ai. Makam masham ngu ai n-gang hte Karai Kasang hte seng ai sut gan ni hpe sha makawp maga na matu n rai, hpyen satan wa lagu la mat wa sai ni hpe mung bai lu la hkra galaw ra ai. Anhte a sak hkrung lam hta nga nga ai Karai Kasang kaw na shaman chyeju hpe gashun gare la na matu shakut nga ai lagut gaw hpyen satan wa nan rai nga ai. Yesu Hkristu gaw anhte kam sham ai Madu rai nna, shi hpe lu la na matu kaning re ai jahpu manu jaw ra ai raitim n hkrit n tsang ai lam hpe, hpyen wa mu hkra galaw ra ai. *Nanhte hta e rawng nga ai wa gaw, mungkan ga e nga ai wa hta grau nna kaba nga ai* (I Yawhan 4:4). “Makam masham” ngu ai n-gang gaw anhte hpe wenyi atsam marai hpe galoi mung jaw ya nga ai lam, anhte a wenyi gasat gala ai hpyen majan hta rai nga ai shaloi myit dum ra nga ai.

KARAI KASANG A HPYEN HKING

f. Karai Kasang a mungga ngu ai Wenyi ntawng nhtu

Karai Kasang a mungga gaw ntawng nhtu hte bung ai lam Ehpesu hpung masha ni hpe Kasa Pawlu tsun da nga ai. Karai Kasang a mungga hte sha anhte hpyen wa hpe dang manga lu na rai nga ai. Ntawng nhtu ngu ai hpe “Wenyi ntawng nhtu” ngu nna lachyum shapraw mai nga ai. Kahtap nna tsun ga nga yang ntawng nhtu gaw ninghkap kasat ai shaloi mung, htim kasat ai shaloi mung tang du ai laknak langai rai nga ai. Hpyen wa hpe aloi sha ninghkap gasat lu ai sha n ga kaga masha ni hpe ka-up dang sha ai lam ni hpe mung gasat jahten kau ya lu nga ai. Dai ntawng nhtu hpe anhte atsawm sha chye lang ai rai yang, nhtu lang grai kung kyang ai hpyen ma hta nga ai nhtu zawn shingdang ai yawng mayawng hpe dinghkren tawk di kau lu nga ai.

Nhtu hpe lang ai rai yang she, dai nhtu gaw dai ai hte atsam rawng nga na re. Mungga ntawng nhtu hpe atsawm sha lang chye na lam matsun nkau mi hpe lawu de jahpan galaw da nngai.

1. Ntawng nhtu lang ai wa gaw shi lang ai nhtu hpe atsawm sha chye lang ra ai.
2. Ntawng nhtu lang ai wa gaw dai nhtu a atsam hpe atsawm sha chye ra ai.
3. Ntawng nhtu gaw hpyen ma wa a atsam hte ningja hpe jat ya nga ai.

KARAI KASANG A HPYEN HKING

4. Ntawng nhtu gaw htim gasat na matu hte ninghkap gasat ai lam hpe lachyum shapraw nga ai.
5. Ntawng nhtu gaw Karai Kasang a mungga masat kumla rai nga ai.
6. Ntawng nhtu hpe lang ai gaw hpyen wa a masing ni hpe ninghkap kasat na matu re.
7. Ntawng nhtu lang ai wa gaw kasat gala ai hpyen magup sumhpa hpe gasat ra na re.

Ntawng nhtu hpe atsawm sha chye lang na matu hpyen ma wa gaw atsawm sha shaman shakyang ai lam hpe galaw ra ai. Hpyen wa gaw n yup ai sha n sim n sa gawan hkawm nga ai majaw, sape ni mung matsun ai hte maren hkan sa ai jawngma ni hte bung ra ai. Tinang a sakhkrung lam hta, kun dingku hta, hpung hta hkrum katut ai hpyen hpe dang manga kau lu na myit mada ai rai yang, Karai Kasang a mungga ngu ai wenyi ntawng nhtu hpe hka ja, matsing sumhting, myit sawn sum ru ai lam ni hpe galaw ra ai.

Anhte Karai Kasang a hpyen hking a lam hpe grau chye na wa saga ai. Rai tim grai ahkyak ai matsing da na lam gaw **Dai hking hpe galoi mung sumraw da na ra ahkyak dik nga ai**. Hpyen hking a lam chye na da tim, bu hpun sumraw da ai lam n nga yang gaw gaman li la sha rai nga ai. Dai lam gaw tatut galaw hkan sa ai lam rai nga ai.

KARAI KASANG A HPYEN HKING

IV. Hpyen ma wa a myit masa (Daw kaji 18-20)

Masha langai a shani shagu na hkawm sa ai lam, kam sham ai lam ni hpe daw dan ya ai gaw dai masha a myit sawn ai lam rai nga ai. Anhte a myit mang ai lam gaw lam magup sumhpa hpe myit mang chye nga ai. Dai myit nan mung Karai Kasang hpe kam sham na hte kam hpa na lam kaw nna anhte hpe gang shingdang chye nga ai. Kaba dik ai majan pa gaw anhte a myit masin hte bawnu myit mang ai lapran kaw rai nga ai. Langai hte langai galoi mung lam kaga ga de n bung ai hku hkawm sa mayu nga ai.

Anhte a myit sawn, myit mang ai lam hta sadia maja na lam hte galaw mai ai lam mali hpe ndai chyumga hta anhte hpe tsun da nga ai.

Nambat langai anhte hpe matsun da ai gaw myit galu ai lam rai nga ai. Myit masin hta rawng sai lam hpe aloi sha a sum jaw kau ai lam n mai galaw ai. Hpyen ma wa gaw shani shagu ningdat ai lam ni law law hpe hkrum ai shaloi, Hkristu a karum la ai lam hta manoi manat nga ra ai. Gat shingjawng poi hta shang lawm gat ai wa zawn pandung shadaw hpe yu azi nna, pai de hkra de n yit ai sha, nhtum nni atsam htum hkra gat ra ga ai.

Sadi maja nga na gaw nambat lahkawng rai nga ai. Yup shamwi nga ai hte kaga lam ni hta anhte a myit wam dam hkawm nga ai lam ni kaw nna koi yen ra ai. Sadi maja let anhte a makau grup yin e byin shai nga ai lam ni hpe dum hprang nga nna, galaw ra ai masing ni hpe myit sumru nna galaw ra ai. Karai Kasang gaw masa hte maren amu galaw ai wa rai nga ai. Aten masa, du hkra

KARAI KASANG A HPYEN HKING

ladaw hta hkan nna jin jin rai nga na matu anhte hpe Shi htet da nga ai. Hpyen wa gaw galoi aten hta htim gasat na hpe n chye lu nga ai. Kadai wa hpe jai lang nna gasat ai lam pru wa na hpe anhte tau hkrau nna n chye lu ai. Yawba hpe hpaji jaw ai ni gaw shi a manang ni rai nna, hkrat sum mat na matu hte Karai Kasang hpe dagam na matu shadut ma ai. Dai hte maren hpyen satan wa gaw anhte a hpu nau sape ni hpe jai lang nna anhte hpe nhtang gasat shangun ai lam galaw chye ai majaw, aten shagu sadu maja nga ra ai. Shara shagu kaw nna du shang wa mai ai gasat gala ai lam ni hpe myit masin, myi, na ni hpaw da nna maja nga ra ai.

Ahkyak nambat masum gaw hpaw tsun ndau shana shabra ai myit manawng rawng ra ai. Yesu Hkristu a chyeju hte tsawra myit hpe sakse hkam hpaw tsun ndau shana shabra ai lam rai nga ai. Shani shagu mungkan hte seng ai lam ni hpe anhte a n-gup kaw nna gahkaw law law hte tsun shaga ga ai. Dai zawn tsun shaga ai shaloi Madu Yesu Hkristu a chyeju hte tsawra myit hpe tsun sakse hkam ai gahkaw ni mung tsun shalawm ra nga ai. Anhte a sak hkrung lam hta kaga masha langai hku nna Karai Kasang hpa baw galaw ya ai lam ni hpe tsun ndau ra ai. Ndai hku nna anhte a myit hpe uphkang nna, myit sawn ai lam ni hpe shading sharai ra ai. Anhte hpa baw tsun ra na myit tsang shara n nga ai, tsun na aten hta tsun ra ai ga hpe Karai Kasang anhte hpe jaw ya na rai nga ai....*ga tsun nga ai ni nanhte n rai, nanhte a kawa a wenyi gaw nanhte hta ga tsun nga ai* (Mahte 10:20).

Hpang jahtum matsing da na lam gaw, anhte kadai ni rai nga ga ai ngu ai hpe chye na ai myit manawng hpe kyem da ra ai. Anhte gaw Hkristu a hkringmang ni rai nga ai. Ndai mungkan ga a

KARAI KASANG A HPYEN HKING

mungchying sha n rai sai, Hkristu a mungdan a mungchying sha ni rai lu sai. Shi a dat kasa hkringmang ni tai na matu anhte ni shaga la hkrum ai ni rai ga ai. Hkaw hkam ni a Hkaw Hkam, karai ni a Karai Wa a gawng malai anhte rai nga lu sa ga ai.

Ga malai langai mi nga ai, “Nang myit ai hte maren nang rai nga ai.” Hkrit tsang ai lam ni hpe nang myit jang hkrit tsang ai lam nang hta byin wa nga ai. Kasat shamyit hkrum ai zawn nga myit jang dai hte maren gasat shamyit ai hkrum nga ai. Chyum mungga hta na a myit masin hpe ru jung da nna, Yesu Hkristu ngu ai dai Madu hta myit maju jung da na gaw ahkyak dik ai sumsaw rai nga ai.

Hkristu a hpyen ma langai a byin da masa lachyum hpe grau chye na na matu lam yan madung nkau mi hpe lawu de mu lu na rai nga ai.

- * Sape ni gaw Hkristu Yesu hte Shi a mungga hta ngang kang ai hpri chyinghkyi jung noi ai zawn, maju jung noi nga ra ai (*Hebre 6:19*).
- * Sape ni gaw shanhte a kata e shanu nga ai Chyoi pra ai Wenyi hpe kam hpa shamyet shanat nna, dai hta e npawt gaw de nga ra ai.
- * Kadai e mung gare la n mai ai sumsing sutgan hpe gadi bu hte bung ai anhte a hkum hkrang kata hta bang da ga ai majaw, kaning re ai mayak mang hkang mung dai hpe jahten kau lu na n rai (*II Korinthu 4: 6-11*).

KARAI KASANG A HPYEN HKING

- * Tsin-yam tsin dam, atsu atsam, zingri zingrat ai, hku hku hpang gara ai, singgu krin ai, shoihpa shoirang re ai lam ni hpe anhte hkrum kadup na rai tim, Hkristu hta e anhte awng padang lu la na rai nga ai (*Roma 8:38*).

V. Hpyen ma wa a atsam (Daw Kaji 18-20)

Gasi, gahkaw ni kaw nna tatut byin tai wa lu na matu gaw akyu hpyi ai hte sha mai byin nga ai. Akyu hpyi ai a majaw Karai Kasang a hpyen hking hpe bu hpun sumraw la lu nga ai. Akyu hpyi ai hte rau mungkan a yubak hpe anhte a ntsa kaw nna gun kabai kau ya nna, Hkristu a dinghpring ai lam hte anhte hpe ka-up kayawp da ya nga ai. Hkristu a mying ningsang hta akyu hpyi ai hte nan anhte gaw Hkristu a hpyen ma ni re ai lam hpe ap nawng shadan shadawng dat ai lam rai nga ai. Nhkring nsa akyu hpyi na lam hpe Kasa Pawlu anhte hpe tsun da nga ai. Akyu hpyi ai lam hta n gun n-yaw mat ai sha n-gun shaja na lam tsun nga ai. Anhte a myit ra ai lam, hpyi nem ai lam ni hpe Karai Kasang a man de akyu hpyi ai hku nna la shang mai nga ai. Anhte a myit masin hta madai ai nsen hpe Karai Kasang madat ya mayu nga ai. Wenyi hta e akyu hpyi ra ai. Karai Kasang a Wenyi hpring ai hte shani shagu akyu hpyi na matu Kasa Pawlu Ehpesu hpung masha ni hpe shadum jahprang nga ai. Karai Kasang a Wenyi hpring ai shaloi anhte a hpyi nem ai lam ni gaw Karai Kasang a myit ra hte langai sha rai wa lu ai. Madu Yesu Hkristu a mai kaja ai lam ni hpe nden ja ai myit hte tsun shaga lu na matu n hkring n sa akyu hpyi ra ai. Anhte a asak hpe hkye hkrang la na matu shi a asai anhte a matu hkaw kau ya sai. Akyu hpyi ai lam gaw sape marai hkum shagu a

KARAI KASANG A HPYEN HKING

sak hkrung lam hta si hkrung si htan ahkyak ai lam re. *n sim n sa akyu hpyi nga mu; lam shagu hta shakawn kungdawn nga mu:* nga nna Htesaloni hpung masha ni hpe Kasa Pawlu tsun da nga ai (I Htesaloni 5:17).

Akyu hpyi ai lam hte seng nna jahkum shatsup chyena da mai ai lam ni

- Anhte tsun ai hte galaw ai lam yawng a lami, zaw si gaw akyu hpyi ai lam re.
- Akyu hpyi ai lam gaw Karai Kasang hte anhte a ading tawk matut mahkai ai lam re.
- Wenyi majan hta awng dang ai lam gaw akyu hpyi ai lam re.
- Akyu hpyi ai lam gaw gahkyin gumdin ai hte pri nem ai lam hpe jaw ya nga ai.
- Akyu hpyi ai lam gaw sape shagu a myit masin kraw lawang hta nga ra ai.
- Kaning re ai mabyin, a hkying a ten shagu hta rai tim, wenyi hta a kyu hpyi ai lam nga ra ai
- Akyu hpyi ai lam gaw anhte hpe sadie maja, majen ai lam hpe jaw ya nga ai.
- Hpu nau sape ni a matu akyu hpyi ya ra ai.

KARAI KASANG A HPYEN HKING

- Hpung sara, hpung woi ni a matu hte shanhte a tsun shaga, sharin a chyin ai lam ni a matu akyu hpyi ya ra ai.
- Hkristu a Kabu Gara Shiga hpe hkaw tsun ai shaloi, hkrit tsang ai myit n rawng ai sha, nden ja ai hte hkaw tsun sakse hkam dan lu na matu akyu hpyi ra ai.
- Kaja ai hkringmang dat kasa ni tai lu u ga, akyu hpyi ra ai.
- Akyu hpyi ai a majaw Yesu Hkristu hte langai hkrai ngang kang ai kanawn mazum lam hpe lu la nga ai.

“Akyu hpyi ai lam gaw galai shai ai lam hpe shabyin ya nga ai.”

VI. Hpyen ma wa a shiga (Daw kaji 19b)

Magam amu a matu tinang a asak hpe apnawng da ai wa hpe hpyen ma ngu ai re. Shi a asak hpe jaw ya na myit shatawng da chyalu rai nga ai. Jaw ra ai jahpu manu kaba ai raitim kadai hpe dawjau nga ai hpe atsawm sha chye na ai majaw, myit dun ai lam n nga ai sha asak apnawng ya lu ma ai. Dai jaw ya ai gaw Hkristu a matu hte Shi a mungdan a matu rai nga ai.

Anhte a yaw shada ai lam gaw wenyi gasat gala ai lam a matu sha n rai, Yesu Hkristu a Kabu Gara Shiga hpe na mayu ai ni hpe hkaw tsun ndau shabra ai mung rai nga ai. Myit mada shara hte asak a mungga hpe lu la mai ai ni yawng hte lu la u ga, ngu ai yaw shada lam hpe Madu Yesu jaw da sai. Anhte a hpyen wa gaw si ai hte hten za ai lam hpe shabyin mayu nga ai. Hkristu a hpyen ma ni

KARAI KASANG A HPYEN HKING

gaw n-gun lapyin dat let marai rawng ai hte ningkap gasat ra ai. Dai gaw anhte a Hkaw Hkam wa a matu rai nga ai. Kabu gara shiga laika gaw anhte a matu kabu gara shiga nan rai nga ai. Myit daw, myit hten hkrum nga ai ni, myit hki lit li ai ni hte garen gari hkrum nga ai ni a matu kabu gara shiga anhte hta e nga nga ai. Hkristu mungkan ga de du sa nna, Kawa Karai Kasang hte anhte matut mahkai kanawn mazum ai lam lu la na matu mahkrai tai ya sai. Anhte a myit masin gindai hta e shanu nga na Shi ra sharawng nga ai.

Ndai kabu gara shiga hpe pru sa nna du ai shara shagu hta e myit marai rawng ai hte tsun shabra na Kasa Pawlu gaw nawku hpung ni hte sape ni hpe tsun shadut da nga ai. Kuning re ai ningdat ai lam ni hkrum wa ai rai tim hkrit tsang ai myit n rawng ai sha Hkristu gaw ngai hpe dai zawn re yak hkak ai, gasat gala ai lam ni hta na lai lu na atsam jaw ya na re ngu, kam sham myit hpe bang jahpring da ra ai. Kaga masha ni gara hku mi mu tim, tswra myit hte nden ja ai hte tinang a nta masha ni, makau grup yin htingbu ni, mare kahtawng hkan e nga ai ni hpe dai kabu gara shiga hpe tsun shana shabra mai nga ai. Tinang nga ai mungdan kata, shingga, mungkan a kaning re ai shara de rai ti mung ra kadawn ai hta hkan nna pru sa na matu awng sharawng ai myit rawng nga ra ai. Anhte a myit masin hta e Hkristu rawng nga ai rai yang, n galaw lu na daram yak hkak ai amu bungli gaw nga na n rai.

Masha langai ngai hpe chye shangun mayu ai lam hpe tinang nan akri akrain shawng chye na da ra ai. Na a myit masin hta asan brang chye na myit hkawn ai lam n nga shi yang, dai kabu gara shiga hpe garan gachyan lu na n rai nga ai. Karai Kasang a

KARAI KASANG A HPYEN HKING

mungga hpe akri akrai chye na na matu shawng sharin hkam la, hkaja ra ai. Kaya shara n rawng ai sha, dai tengman ai mungga hpe ding ding chye hpajang ai magam gun hpai ai wa tai lu na matu, dai mungga hpe chye na hkra shakut ai lam hta shaja nga na matu Kasa Pawlu gaw Timohti hpe shadum sharin wu ai (*II Timohti 2:15*). Chyum mugga hpe hkaja ai hte akyu hpyi ai lam gaw sape shagu a shani shagu galaw ra ai amu rai nga ai. Ndai lam lahkawng n lawm ai sha hpyen majan hta shang kasat ai rai yang, Hkristu a atsam hte n rai, tinang a atsam hte sha gasat shang lawm ai rai nga ai.

Sape tai ai lam ngu ai gaw sak hkrung, nga sat nga sa ai lai langai nan rai nga ai. Anhte gaw mungkan a sak hkrung lai hte shai ai hku nna sak hkrung ra ai. Htingrai htingrat hkringmang ni tai wa ra ai hte maren, Hkristu hta maju jung, Shi a mungga hta jung noi ai lam nga ra ai. Yesu Hkristu a lam kabu gara shiga hte Shi a htani htana mungdan a lam hpe nden marai rawng let pru sa nna ndau shabra na lit lu a hpyen ma langai zawn rai ra ai. Hkristu hte Shi a tengman ai lam hta jung noi nga nna dai lam hta myit nawng shatawng na matu shaga la ai lam rai nga ai.

GA HPUNGDIM

Bawng dung sharen da hkrum ai lam kaw na shalawt dat na gaw anhte a yaw shada ai lam rai nga ai. Dai gaw Karai Kasang anhte hpe jaw ai hpyen majan ban dung yaw shada ai lam re.

KARAI KASANG A HPYEN HKING

Hpyen ma a astam ningja pru wa na matu, Hkristu a hpyen hpung hta hpyen ma jahpan shawng bang ra ai. Dai hpang hpyen ma wa a hkyen lajang ai lam hku nna, Karai Kasang a mungga hte sharin jahpat ai lam hpe galaw mat wa ra ai.

Chyoipra ai Wenyi anhte hku nna bungli galaw ai lam nga ra ai. Dai gaw Wenyi ntawng nhtu a atsam hpe hpaw shapraw dat ai rai nga ai. Karai Kasang a Wenyi gaw hpyen ma wa a ntsa e n rai yang, dai nhtu lang ai gaw hkum shan atsam hte sha lang ai rai nga ai. Wenyi hte hpring ai shaloi, myit masin hte wenyi hpe mung, nra hkri hkraw hte laswi lasa ni hpe mung, dinghkren ginhka kau ya lu nga ai (*Hebre 4:12*).

Kam sham ai sape marai hkum dek gaw nawku hpung a ndan pala ni rai nga ai. Yawng mayawng hpe chye na shangun ai, simsa lam hte ngwi pyaw ai lam anhte hpe jaw da sai. Dai gaw Hkristu a Wenyi hku nna sha chye na lu nga ai. Anhte a sak hkrung lam hpe Hkristu hte bung hkra shakut magang, ning dat ai lam ni hpe hkrum magang rai nga ai. Raitim shi hta jung noi ai lam gaw grau ngang kang wa lu nga ai. Wenyi hpyen hking a majaw hpyen wa a kasat gala ai hpe anhte ningkap lu nga ai. Myit masin hte salum hta e majan gasat ai lam gaw anhte a sak hkrung lam hta shani shagu hkrum kadup nga ai.

Anhte a nga sat nga sa, kanawn mazum ai lam gaw mungkin ga hte nhtan shai ai hte manghkang ni hkrum nga ai. Rai ti mung Chyoipra ai Wenyi hku nna Hkristu gaw anhte hte shani shagu rau hkawm sa nga ai. Hkristu hta rai yang n byin mai ai lam

KARAI KASANG A HPYEN HKING

n nga ai. Yawng mayawng hpe dang di lu ai gaw Karai Kasang nan rai nga ai (*Mahte 19:26, Marku 9:23:24*).

Kasa Pawlu gaw Timohti hpe tsun da ai ga ni hpe la kap nna n dai laika buk hpe hpung dim mayu nngai.


*Ngai gaw kaja ai gasat gala gasat ngut se ai;
gat shingjawng ai lam htum hkra gat shadu se ai;
dai makam masham hpe ngai a manoi nga ni ai:
ya kaw nna, ding hpring ai tara agyi ngu ai, dai Madu gaw,
dai nhtoi hta e ngai hpe ap ya na, ding hpring ai hte seng ai
ja janmau gaw, nye a matu mazing da nu ai: ngai hpe sha n
rai, shi a dan pru ai lam hpe sharawng awng ai ni nlang hte
hpe mung, ap ya na ra ai (II Timohti 4:7-8).*

Sumsing lamu gaw anhte a nta hte ban dung rai nga ai.

KARAI KASANG A HPYEN HKING

Appendix:

- a. Hpyen gasat na jin jin rai nga sai hpyen ma langai a hpyen hkying ni



- | | |
|----------------|--|
| A. Shingkyit | Tengman ai |
| B. Sinda magap | Dinghpring ai |
| C. Hkyepdin | Ngwi pyaw sims lam ngu ai kabu
gara shiga hkaw tsun na sha jin ai |

KARAI KASANG A HPYEN HKING

D. Hpri gup chyawp Hkye hkrang la ai

E. N-gang Makam masham

F. Ntawng nhtu Karai Kasang a mungga ngu ai
Wenyi

b. Kahtap nna hti na chyum ga ni

Mahte 24:1-44 hpang jahtum nhtoi majan

I Korinhtu 9:26 jan mau shagrau hkam ai

I Htesaloni 5:1-11 hpyen majan

I Timohti 1:18 teng man ai makam masham majan

I Timohti 6:12 tengman ai makam masham majan

II Timohti 2:3 kaja ai hpyen ma a hkam sharang
lam

KARAI KASANG A HPYEN HKING

c. Matsing na hte bai myit sumru ka na matu

KARAI KASANG A HPYEN HKING

Matsing na hte bai myit sumru ka na matu

Sape wa gaw sasana amu magam a matu jin jin rai nga ra ai

Order Form – Kachin

SERIES	BOOK	PRICE	QTY	TOTAL
Leadership	Relationship Pilgrimage Kanawn Mazum Hkrun Lam	\$4.95		
Leadership	Christ's Disciple Hkristu a Sape	\$4.95		
Leadership	Disciple's Prayer Life Sape Majing a Akyu Hpyi Sak Hkrung Lam	\$4.95		
Leadership	Communion Madu a Shana Lusha Poi (Poi Daw)	\$4.95		
Leadership	Ambassadors for Christ Hkristu a Dat Kasa Ni	\$4.95		
Leadership	Full Armour of God Karai Kasang a Hpyen Hking	\$4.95		
Other	Booker T. Washington a Sak Hkrung Lam Labau	\$6.95		
Other	Children's Catechism Karai Kasang a Tara Ma Ni Hpe Jahpat Ai Laika	\$6.95		
Other	18 Old Testament Children's Stories with colour pictures Ga Shaka Dingsa na Maumwi Shi Matsat	\$34.95		
Other	18 Old Testament Children's Stories with black & white pictures Ga Shaka Dingsa na Maumwi Shi Matsat	\$24.95		
Other	Bible Word Study Book - English / Kachin	\$14.95		
Other	Bible Information Chyum Laika	\$4.95		
Other	Matthew Yesu Hkristu a Kabu Gara Shiga: Mahte a Laika	\$6.95		
Other	Matthew, Mark, Luke, John Yesu Hkristu a Kabu Gara Shiga: Mahte Marku Luka Yawhan	\$24.95		

Order online or by e-mail: www.lambs.ca | printing@vanpelts.ca
 For mass distribution, contact us for pricing.



PROJECT L.A.M.B.S. INTERNATIONAL

Project LAMBS Publications:
Canada / Myanmar / Thailand
www.projectlambs.com

Leadership Series - Level 4

Kachin | \$6.95 CDN
ISBN 978-1-927468-19-7



9 781927 468197

